

神農本草經疏卷之七

草部上品之下

總五十三種今疏其要者二十五種

藍實

芎藭

黃連

絡石 木蓮

蒺藜

黃耆

肉蓯蓉

防風

蒲黃

續斷

漏蘆

營實

天名精

決明子

丹參

茜根

五味子

蘭草

忍冬

蛇床子

景天

茵陳蒿

沙參

王不留行

長松

藍實味苦寒無毒主解諸毒殺蠱蚊疰鬼瘧毒
久服頭不白輕身其葉汁殺百藥毒解狼毒射

罔毒

疏○藍實稟天地至陰之精故其味苦寒而

無毒其用主解諸毒殺蠱蛟疰鬼螫毒久服
頭不白頭白者血熱也藍能涼血而解熱故
令髮不白也熱去而血得所養故身輕其葉
汁解百藥毒解狼毒射罔毒藥性論云藍實
味甘能填骨髓益心力汁止心煩躁由此觀
之苦寒而兼甘可知矣日華子又云治天行
熱狂疔瘡遊風熱毒腫毒風癩除煩止渴殺
疳解毒藥毒箭金瘡血悶排膿小兒熱疳小

兒丹熟最爲要藥其功用之廣具如本草所
載蓼藍最堪入藥甘藍人食去熱黃

主治參互

藍汁入麝香雄黃治蜘蛛咬有神 乾藍爲
末同犬肉空腹食之主長肉內塞

簡誤

虛寒人及久泄畏寒腹中覺冷者勿服

芎藭味辛溫無毒主中風入腦頭痛寒痺筋攣

緩急金瘡婦人血閉無子除腦中冷動面上遊
風去來目淚出多涕唾忽忽如醉諸寒冷氣心
腹堅痛中惡卒急腫痛脇風痛溫中內寒動宜作痛
疏○芎藭稟天之溫氣地之辛味辛甘發散
爲陽是則氣味俱陽而無毒陽主上升辛溫
注散入足厥陰經血中氣藥扁鵲言酸以其
入肝也故主中風入腦頭痛寒痺筋攣緩急
金瘡婦人血閉無子別錄除腦中冷動面上

遊風去來目淚出多涕唾忽忽如醉諸寒冷
氣心腹堅痛中惡卒急腫痛脇風痛溫中內
寒已上諸病皆病在血分正以其性走竄而
絕無陰凝黏滯之性故入血藥上行而不可
多用耳

主治參互

同地黃當歸芍藥爲四物湯通主入血分補

益 同荆芥白芷當歸地黃芍藥朮甘草瀉

破傷風冬月加桂枝 同當歸地黃乾漆

胡索五靈脂芍藥牡蠣粉京三稜治血瘕

同白芷茜根黃耆金銀花生地黃能排膿消

瘀血 同甘菊花當歸地黃天門冬白芍藥

炙甘草專主血虛頭痛火盛者加重便服

同當歸尾桂心牛膝治子死腹中 同續斷

懷熟地白膠杜仲山茱萸五味子人參黃耆

酸棗仁治血崩久不止

簡誤

芎藭性陽味辛凡病人上盛下虛虛火炎上
嘔吐咳嗽自汗易汗盜汗咽乾口燥發熱作
渴煩躁法並忌之

黃連味苦寒微寒無毒主熱氣目痛背傷淚出
明目腸澼腹痛下痢婦人陰中腫痛五藏冷熱
久下洩澼膿血止消渴大驚除水利骨調胃厚
腸益膽療口瘡久服令人不忘

疏○黃連稟天地清寒之氣以生故氣味苦
寒而無毒味厚於氣味苦而厚陰也宜其下
洩欲使上行須加引導入手少陰陽明足少
陽厥陰足陽明太陰爲病酒之仙藥滯下之
神草六經所至各有殊功其主熱氣目痛眦
傷淚出明目大驚益膽者涼心清肝膽也腸
澼腹痠下痢別錄兼主泄澼泄者瀉利也澼
者大腸下血也俗呼爲臟毒除水利骨厚腸

胃療口瘡者滌除腸胃脾三家之溼熱也久服令人不忘者心家無火則清清則明故不忘禪家習定多飲苦茗亦此義爾

主治參互

同赤檉木葉入三黃石膏湯治痧癘已透而煩躁不止有神入當歸六黃湯加棗仁龍眼治盜汗有神同地黃甘菊荆芥穗甘草稍芎藭柴胡蟬蛻木通治風熱上攻目赤痛

黃連末一兩同雄羊肝一具生搗勻衆手
丸如梧子每服以滾漿水吞廿一丸諸眼目
疾及障翳青盲皆主之禁食猪肉雖油汁亦
勿入口作六劑必效矣 同當歸甘菊花人
乳浸蒸入明礬銅綠各少許洗目甚效 同
芍藥蓮子菡豆升麻甘草滑石紅麴治一切
滯下膿血 同槐花枳殼乳香沒藥治滯下
純血腹痛煮服神效 同五穀蟲蘆薈白蕪

美青黛白朮花白芙蓉花治小兒一切疳熱
如神 同赤小豆爲細末傅痔瘡妙 同乾
葛甘草升麻芍藥治痧癘後泄瀉 同五味
子麥門冬乾葛治酒病酒傷如神 同五味
子甘草煮濃汁漱口治口糜口瘡良 同麥
門冬五味子治卒消渴小便多良 同人參
蓮子治虛人患滯下及老人產婦滯下不止

黃連味大苦氣大寒羣草中清肅之物其處
上經譬猶臯陶之在虞廷明刑執法以禁民
邪是其職也稷契夔龍之事則非其任矣故
祛邪散熱蕩滌腸胃肅清神明是其性之所
長而於補益精血溫養元氣則其功泊如也
凡病人血少氣虛脾胃薄弱血不足以致驚
悸不眠而兼煩熱躁渴及產後不眠血虛發
熱泄瀉腹痛小兒痘瘡陽虛作泄行漿後泄

瀉老人脾胃虛寒作瀉陰虛人天明溇泄病
名腎泄真陰不足內熱煩躁諸證法咸忌之
犯之使人危殆大忌猪肉

絡石味苦溫微寒無毒主風熱死肌癰傷口乾
舌焦癰腫不消喉舌腫不通水漿不下大驚入
腹除邪氣養腎主腰髑痛堅筋骨利關節久服
輕身明目潤澤好顏色不老延年

傷宜
作瘍

疏○絡石稟少陽之令兼得地之陰氣其味

苦其氣溫微寒而無毒入足陽明手足少陰
足厥陰少陽經故主風熱死肌癰傷口乾舌
焦癰腫不消喉舌腫水漿不下皆苦溫通氣
血血屬陰陰寒入血而除熱之效也又能除
邪氣養腎主腰髁痛堅筋骨利關節療蛇毒
心悶刀斧傷擣封立差皆涼血除熱之功也
本經久服輕身明目潤澤好顏色不老延年
陳藏器以爲能變白亦指益陰涼血而言也

生石上者良

主治參互

絡石搗汁入諸解毒藥治發背癰疽神驗
外臺秘要治喉痺喘息不通須臾欲絕以絡
石二兩水一升煎取一大盞去滓細細喫須

臬卽通

簡誤

陰臟人畏寒易泄者勿服